



NEGERI TERENGGANU
TAMBAHAN PERUNDANGAN

AKTA KERAJAAN TEMPATAN 1976 [AKTA 171]

Tr. P.U. 12 / 1990 UNDANG-UNDANG KECIL
KEDAI GUNTING RAMBUT DAN PENDANDAN RAMBUT (MAJLIS
DAERAH KEMAMAN) 1989

Tarikh Penyiaran : 2 Ogos 1990
Tarikh mula kuat kuasa : 2 Ogos 1990

SUSUNAN UNDANG-UNDANG KECIL

Mukadimah

- Undang-undang Kecil 1. Nama, pemakaian dan mula berkuatkuasa.
Undang-undang Kecil 2. Tafsiran.
Undang-undang Kecil 3. Lesen, bayaran dan pemeriksaan.
Undang-undang Kecil 4. Kebersihan premis dan perkakas.
Undang-undang Kecil 5. Bekalan air panas dan sejuk.
Undang-undang Kecil 6. Bekas bagi tuala kotor dan buangan tred.
Undang-undang Kecil 7. Kehendak-kehendak kebersihan yang mesti dipatuhi oleh pendandan rambut.
Undang-undang Kecil 8. Tuala muka yang bersih dan lain-lain untuk seorang pelanggan.
Undang-undang Kecil 9. Sabun untuk cukuran.
Undang-undang Kecil 10. Cawan cukuran.
Undang-undang Kecil 11. Penggunaan span dilarang.
Undang-undang Kecil 12. Memberhentikan keluaran darah.
Undang-undang Kecil 13. Penyakit-penyakit berjangkit atau menular.
Undang-undang Kecil 14. Membasmikan kuman dari alat-alat.
Undang-undang Kecil 15. Meludah.
Undang-undang Kecil 16. Binatang dilarang masuk.
Undang-undang Kecil 17. Penalti.
Undang-undang Kecil 18. Salinan undang-undang kecil hendaklah dipamerkan dalam kedai gunting rambut.
Undang-undang Kecil 19. Pembatalan.

Mukadimah

PADA menjalankan kuasa-kuasa yang diberi oleh seksyen 102 Akta Kerajaan Tempatan 1976, Majlis Daerah Kemaman membuat dan menurut seksyen 103 Akta tersebut Pihak Berkuasa Negeri mengesahkan undang-undang kecil yang berikut:

Undang-undang Kecil 1. Nama, pemakaian dan mula berkuatkuasa.

- (1) Undang-undang Kecil ini bolehlah dinamakan Undang-Undang Kecil Kedai Gunting Rambut dan Pendandan Rambut (Majlis Daerah Kemaman) 1989 dan hendaklah dipakai untuk kawasan Majlis Daerah Kemaman.
- (2) Undang-undang kecil ini hendaklah mula berkuatkuasa pada tarikh ia disiarkan dalam *Warta*.

Undang-undang Kecil 2. Tafsiran.

Dalam undang-undang kecil ini melainkan jika kandungan ayatnya menghendaki makna yang lain-

“dandan rambut” termasuk potong rambut, kerinting rambut, potong-kemas, mencelup, mencukur, mensyampu dan tiap-tiap kerja seumpama itu yang biasanya dilakukan oleh seorang pendandan rambut sama ada dengan tangan, dengan alat, dengan elektrik atau dengan menggunakan apa-apa serbuk atau larutan atau dengan apa-apa kombinasi cara-cara itu.

“kedai gunting rambut” termasuk sesuatu kedai pendandan rambut dan tiap-tiap salun dan semua premis yang di dalam atau di atasnya urusan dandan rambut dijalankan;

“larutan disinfektan” ertinya larutan apa-apa disinfektan yang sama kekuatan racun kumannya dengan 5 peratus larutan asid karbolik.

“pendandan rambut” termasuk seorang penggunting rambut dan (semasa orang itu menjalankan kerja berkaitan dengan dandan rambut dalam kedai gunting rambut) seorang pekerja pendandan rambut;

“Yang Dipertua” ertinya Yang Dipertua Majlis Daerah Kemaman dan termasuk Timbalan Yang Dipertua.

Undang-undang Kecil 3. Lesen, bayaran dan pemeriksaan.

- (1) Tiada mana-mana premis boleh digunakan sebagai kedai gunting rambut melainkan jika premis itu dileSEN oleh Yang Dipertua.
- (2) Sesuatu lesen, melainkan jika digantung atau dibatalkan terlebih awal, hendaklah berkuatkuasa sehingga 31hb Disember berikut dari tarikh bermulanya lesen itu, tetapi boleh dibaharui pada atau sebelum 31hb Disember tiap-tiap tahun.
- (3) Tiap-tiap orang yang berkehendakkan lesen atau pembaharuan lesen hendaklah membuat permohonan bertulis kepada Yang Dipertua.

- (4) Bayaran yang kena bayar bagi suatu lesen adalah 12 ringgit bagi satu kerusi bagi satu tahun.
- (5) Yang Dipertua hendaklah menyimpan suatu daftar semua permohonan sedemikian.
- (6) Dalam masa sesuatu lessen itu berkuatkuasa Yang Dipertua boleh, atas permohonan pemegang itu, membenarkan lessen itu dipindahmilik kepada seorang lain.
- (7) Tiap-tiap pendandan rambut yang menjalankan perniagaan atau urusan pendandan rambut atau menjaga atau diambil bekerja di premis di mana urusan tersebut dijalankan hendaklah membenarkan Yang Dipertua atau mana-mana orang yang diberi kuasa dengan sewajarnya olehnya memasuki premis itu pada bila-bila masa yang munasabah tanpa notis dan memeriksa premis itu dan tiap-tiap bahagiannya dan tidak boleh menghalang atau membenarkan orang itu dihalang daripada membuat pemeriksaan itu.

Undang-undang Kecil 4. Kebersihan premis dan perkakas.

Premis tiap-tiap kedai gunting rambut, perkakas-perkakas, perabot dan alat-alat hendaklah pada setiap masa disenggara di dalam keadaan baik dan berada di dalam keadaan yang sungguh bersih.

Undang-undang Kecil 5. Bekalan air panas dan sejuk.

Bekalan air panas dan sejuk yang mencukupi hendaklah diadakan terus menerus di tiap-tiap kedai gunting rambut semasa ia dibuka untuk urusan.

Undang-undang Kecil 6. Bekas bagi tuala kotor dan buangan tred.

Hendaklah diadakan di tiap-tiap kedai gunting rambut sekurang-kurangnya dua bekas yang sesuai yang bertudung rapat, yang ke dalam satu daripadanya hendaklah dimasukkan semua tuala kotor dan kain-kain lain selepas sahaja digunakan, dan ke dalam yang satu lagi dimasukkan semua keratan rambut, dan lain-lain buangan tred dengan seberapa segera yang praktik selepas melayan seorang pelanggan.

Undang-undang Kecil 7. Kehendak-kehendak kebersihan yang mesti dipatuhi oleh pendandan rambut.

- (1) Sebelum melayan seorang pelanggan, tiap-tiap pendandan rambut hendaklah mencuci tangannya dengan sepenuhnya, dengan menggunakan sabun dan air bersih, dan bila perlu menggunakan berus kuku untuk maksud ini.
- (2) Tiap-tiap pendandan rambut hendaklah, semasa melayan seorang pelanggan, mamakai kot atau overall yang bersih dan padan berwarna putih atau warna cerah diperbuat dari kain yang boleh dibasuh.
- (3) Tiap-tiap pendandan rambut hendaklah menjalani pemeriksaan doctor setahun sekali.

Undang-undang Kecil 8. Tuala muka yang bersih dan lain-lain untuk seorang pelanggan.

- (1) Tuala muka, pelindung leher, tuala leher dan fabrik-fabrik yang lain yang secara lansung menyentuh kulit seseorang pelanggan hendaklah diadakan yang bersih dan yang baru untuk setiap pelanggan.

(2) Tuala muka hendaklah direndam dalam air mendidih atau diwap selama sekurang-kurangnya 5 minit dan kemudiannya dibasuh sebelum digunakan pada tiap-tiap pelanggan.

Undang-undang Kecil 9. Sabun untuk cukuran.

Tiada apa-apa sabun melainkan sabun cecair atau krim cukuran atau serbuk cukuran boleh digunakan bagi maksud mengeluarkan buih bagi mana-mana pelanggan yang menghendaki cukuran.

Undang-undang Kecil 10. Cawan cukuran.

Cawan yang digunakan untuk mengisi air bagi mengeluarkan buih untuk cukuran hendaklah dikosongkan selepas sahaja digunakan bagi tiap-tiap pelanggan dan dicuci sepenuhnya dengan air mendidih.

Undang-undang Kecil 11. Penggunaan span dilarang.

Span atau puff bedak tidak boleh digunakan ke atas pelanggan.

Undang-undang Kecil 12. Memberhentikan keluaran darah.

Keluaran darah hendaklah diberhentikan hanya dengan suatu stiptik yang sesuai, yang hendaklah digunakan ke atas pelanggan sahaja dan hendaklah selepas sahaja digunakan dimasukkan dalam bekas yang disediakan untuk bangunan tred.

Undang-undang Kecil 13. Penyakit-penyakit berjangkit atau menular.

(1) Mana-mana orang yang mengidap apa-apa penyakit berjangkit atau menular, atau apa-apa ruam atau letusan berjangkit atau menular dimuka, leher atau kulit kepala, hendaklah memberitahu pendandan rambut tentang adanya penyakit, ruam atau letusan itu sebelum ia membiarkan kerja mendandan rambut dijalankan ke atas dirinya.

(2) Tiap-tiap pendandan rambut, apabila diberitahu sedemikian atau tanpa diberitahu, dengan sendirinya mengetahui bahawa seseorang itu mengidap apa-apa penyakit berjangkit atau menular atau letusan berjangkit atau menular hendaklah, semasa melayan orang itu, menggunakan alat-alat berasingan yang diasingkan untuk digunakan khas bagi orang-orang itu. Alat-alat itu hendaklah selepas sahaja digunakan direndam dalam satu larutan disinfektan selama sekurang-kurangnya lima minit. Semua tuala, kain atau fabrik lain yang digunakan ke atas orang itu atau kot atau overall yang dipakai oleh pendandan rambut itu hendaklah selepas sahaja digunakan dimasukkan dalam satu larutan disinfektan atau dalam air mendidih selama sekurang-kurangnya sepuluh minit.

(3) Seseorang pendandan rambut yang mengidap apa-apa penyakit berjangkit atau menular atau apa-apa penyakit berjangkit atau menular atau apa-apa ruam atau letusan kulit berjangkit atau menular tidak boleh melayan mana-mana pelanggan.

Undang-undang Kecil 14. Membasmikan kuman dari alat-alat.

(1) Tiap-tiap pendandan rambut hendaklah menyebabkan semua kelengkapan bagi kegunaan am yang ternyata di bawah ini dibasmikan kuman mengikut cara yang ditetapkan, atau sebagai ganti dengan cara pembasmian kuman yang berkesan melalui diangan lampu ungu yang diluluskan oleh Yang Dipertua:

- (a) pisau cukur; gunting dan sikat – dengan merendamkan selama sekurang-kurangnya tiga minit dalam larutan disinfektan.
- (b) perepang (clipper) – dengan mula-mulanya memberus sepenuhnya gigi-giginya dengan suatu berus yang bersih dari kuman untuk membuang semua rambut dan kemudian mengesat gigi-gigi itu dengan kain yang telah dicelup dalam larutan disinfektan.
- (c) Berus rambut – dengan merendam bahagian bulu atau bulu keras selama sekurang-kurangnya tiga minit dalam larutan disinfektan yang sesuai dan kemudian keringkan berus itu dalam ruang udara-panas.
- (d) Berus cukur – apabila suatu berus baru mula digunakan, rendamkan bahagian bulu keras dalam larutan formalin 10 peratus selama sekurang-kurangnya tiga puluh minit dan selepas itu bilas dalam air bersih. Apabila hendak digunakan lagi kemudiannya, dengan merendamkan bahagian bulu atau bulu keras dalam air mendidih selama sekurang-kurangnya tiga minit kecuali jika bulu keras itu dibuat daripada apa-apa bahan sintetik memadai lah membasuhnya dengan sabun dan air.

(2) Semua kelengkapan yang tersebut dalam perenggan (1) hendaklah dibasmikan kuman mengikut cara yang dinyatakan di atas sebelum digunakan tiap-tiap hari dan selepas sahaja digunakan ke atas tiap-tiap pelanggan.

Undang-undang Kecil 15. Meludah.

Tiada seorang pun boleh meludah ke lantai atau dinding kedai gunting rambut.

Undang-undang Kecil 16. Binatang dilarang masuk.

Tiada seorang pun pendandan rambut yang boleh menyebabkan atau membenarkan apa-apa binatang masuk atau berada dalam kedai gunting rambut.

Undang-undang Kecil 17. Penalti.

Seseorang yang melanggar mana-mana undang-undang kecil ini adalah melakukan suatu kesalahan dan apabila disabitkan boleh dikenakan denda tidak melebihi dua ribu ringgit atau penjara selama tempoh tidak melebihi satu tahun atau denda dan penjara itu kedua-duanya.

Undang-undang Kecil 18. Salina undang-undang kecil hendaklah dipamerkan dalam kedai gunting rambut.

Suatu salinan undang-undang kecil, yang diletakkan dalam frame yang sesuai, hendaklah dipamerkan dengan cara mudah dilihat dalam tiap-tiap kedai gunting rambut dan hendaklah sentiasa dijaga oleh pemegang lessen, pengurus atau orang yang bertugas dalam keadaan bersih, boleh dilihat dan dibaca.

Undang-undang Kecil 19. Pembatalan.

Peraturan-peraturan Kedai Gunting Rambut dan Pendandan Rambut seksyen 150, Undang-undang Bandaran Bil. 12 Tahun 1355 Menjaga Kebersihan Awam adalah dengan ini dibatalkan.

Diperbuat oleh Majlis Daerah Kemaman di dalam mesyuaratnya pada 23 Mei 1989.

[MDK. 1202 SJ 5]

HARUN BIN HASAN,
Yang Dipertua,
Majlis Daerah Kemaman

Disahkan oleh Pihak Berkuasa Negeri di dalam mesyuarat pada 4 April

1990. [SUK. TR. 1200/355/4; PUN. TR. (S) 85/3/5]

OSMAN BIN MUDA,
Setiausaha,
Majlis Mesyuarat Kerajaan Negeri,
Terengganu